

楞伽阿跋多羅寶經卷第三

宋天竺三藏求那跋陀羅譯

一切佛語心品之三

爾時，大慧菩薩復白佛言：

「世尊！唯願為說佛之知覺。

世尊！何等是佛之知覺？」

佛告大慧：

「覺人法無我，了知二障，

離二種死，斷二煩惱，

是名佛之知覺。

聲聞、緣覺得此法者，亦名為佛。

以是因緣故，我說一乘。」

爾時，世尊欲重宣此義而說偈言：

「善知二無我，二障煩惱斷，

永離二種死，是名佛知覺。」

【經文資訊】大正藏第 16 冊 No. 0670 楞伽阿跋多羅寶經

大乘密嚴經卷上

唐天竺三藏地婆訶羅奉制譯

大乘密嚴經妙身生品第二之一

內證真實智，現前所住法，
是即說圓成，眾聖之境界。
佛及諸佛子，證此名聖人，
若人證斯法，即見於真際，
唱言生已盡，梵行皆已立。
所作莫不成，永離於諸有，
解脫一切苦，滅除眾怖畏。
生法二無我，善能明了知，
普燒諸習氣，永斷於分別。
從於無始來，戲論而積聚，
無量眾過惡，一切皆已除。
譬如熱鐵團，熱去鐵無損，
解脫者亦爾，惑盡而清涼。
入於無漏界，密嚴之妙土，
此土最微妙，非餘所能及。
佛與諸菩薩，清淨之所居，
三昧樂現前，以此而為食。
欲生斯土者，當修真實觀，
復為諸有緣，如理廣宣說。

【經文資訊】大正藏第16冊 No. 0681 大乘密嚴經

大乘密嚴經卷下

唐天竺三藏地婆訶羅奉制譯

阿賴耶微密品第八

佛及諸菩薩，能知法無我，
已得成如來，復為人宣說。
分析於諸蘊，見人無我性，
不知無有法，是說為聲聞。
菩薩善能觀，人法二無我，
觀已即便捨，不住於真際。
若住於真際，便捨大悲心，
功業悉不成，不得成正覺。

【經文資訊】大正藏第 16 冊 No. 0681 大乘密嚴經